

28. december 2017

**Qimminik qitsunnillu ningarniaasarnermut toqutsisarnermullu Namminersorlutik
Oqartussat nalunaarutaat nr. 25, 28. decembari 2017-imeersoq**

Uumasunik illersuineq pillugu Inatsisartut inatsisaanni nr. 25, 18, december 2003-meersumi § 10, § 13, imm. 2 aamma § 27, imm. 2-3 malillugit aalajangersarneqarpoq:

Kapitali 1

Atuuffia nassuiaatillu

Atuuffia

§ 1. Nalunaarummi uani ilaatinneqarput qimminik qitsunnillu tigusinerit toqutsinerillu suulluunniit, apeqqutaatinnagu tamatumani suliarinnittut inuinnaanersut imaluunniit inunnit atorfimminnut atatillugu, pisinnaatinneqarnerminnut imaluunniit tassunga immikkut piginnaatinneqarnissamut akuerineqarsimasuunersut.

Imm. 2. Uumasut nakorsaasa qimminik qitsunnillu nakorsaatinik atuillutik toqutsisarnerat nalunaarummi uani ilaatinneqanngillat.

Nassuiaatit

§ 2. Nalunaarummi matumani uku imatut paasineqassapput:

- 1) "Toqutsineq", qanoq iliuuseqarneq ilisimaaralugu suliasamik ingerlatsineq, taassumalu uumasup toquneranik kinguneqassasoq.
- 2) "Qimmit", qimmit tamarmik, aamma inuussutissarsiornermi qimmit, matumani qimmit qimuttut savaatillillu qimmii.
- 3) "Ningarniaaneq", uumasumik ningarniaalluni suliat tamarmik aallartinneqarneranit toqutsinissap tungaanut. Tassunga ilaatinneqassaaq uumasumik paarsineq ilaatigullu inuttassarsiuussineq.

Kapitali 2

Qimminik qitsunnillu ningarniaaneq

§ 3. Qimminik qitsunnillu tigusineri illersorneqarsinnaasumik pineqassapput pisariaqanngitsumillu naalliutsinneqassanatik.

§ 4. Toqutsiniarneq siunertaralugu tigusiniaaneq taamaallaat pisassaaq kommunimit imaluunniit uumasut nakorsaannit qinnuigineqarnikkut, toqutsiniarneq uumasunik illersuiniarnermik pisariaqartutut isigineqanngippat, taamaattoq imm. 2 takuuk.

Imm. 2. Imm. 1-imi pineqanngillat qimmit qitsuilluunniit inuttaasa nammineq uumasuutiminnik tigusiniaanerat.

§ 5. Qimminik tigusiniarneq tassunga atugassat karsit pullatit atorlugit taamaallaat pisassaaq, pullatillu ilua minnerpaamik 120 cm × 60 cm × 70 cm.-isut angissuseqassaaq. Qitsunnik tigusiniaaneq tassunga atugassat karsit pullatit atorlugit taamaallaat pisassaaq, pullatillu ilua minnerpaamik 45 cm × 30cm × 30 cm-iusunik angissuseqassaaq.

Imm. 2. Pullatit iluisa iigai inngigissunik sineqassanngillat, aniinganertaqaratik allanilluunniit uumasumut ajoqusiisinnaasumik peqassanatik.

Imm. 3. Pullatit ungerutissianik nuiuuksanik peqanngikkunik naammattunik amerlassusilinnik silaannarissarfeqassapput, uumasooq taamaalilluni nillarsersinnaaniassaaq ajornanngitsumillu anersaartorsinnaassalluni.

§ 6. Pullatit matugaangata uumasumut innarliisinnaassanngillat.

§ 7. Pullatit ukioq tamaat atornerarsinnaapput.

Imm. 2. Piffissami maajip aallaqqaatanit 30. septemberimut pullatit akunnerit 12-kkaarlugit takusarneqartassapput.

Imm. 3. Piffissami 1. oktober 30. aprilimut pullatit akunnerit 8-kkaarlugit takusarneqartassapput.

§ 8. Uumasut tiguneqartut piaarnerpaamik chippeqarnerisut, ujameqarnerisut allatulluunniit ilisarnaarserneqarsimanersut misissorneqassapput piginnittumut kinaassusersiutaasinnaanersut misissorneqassallutik.

Imm. 2. Piginnittoqartoq paasineqarsinnaappat uumasooq pullammit anisinneqassaaq uumasorlu sumut aaneqarsinnaanersooq pillugu piginnittoq piaartumik ilisimatinneqassalluni.

Imm. 3. Piginnittoqartoq imm. 1 malillugu paasineqarsinnaanngippat uumasooq inuttassarsiuunneqassaaq qimmit qitsuillu pillugit kommuniq ileqqoreqqusaliaani malittarisassat naapertorlugit. Uumasooq toqunneqassanngilaq inuttassarsiuunneqarneranit akunnerit 72-it qaangiutsinnagit.

Imm. 4. Uumasooq miluttunik piaraqarnerisooq misissoqqaarneqartuaannassaaq. Uumasooq miluttunik piaraqarpat ingerlaannaq iperarneqassaaq, piaraasa tamakkerlugit tiguneqarsimanerat qulakkeerneqanngippat.

Kapitali 3

Toqutsineq igitsinerlu

§ 9. Qimmit aallaallugit toqunneqartassapput. Qitsuit gassi atorlugu imaluunniit aallaallugit toqunneqartassapput.

Imm. 2. Qimminik qitsunnillu toqutsineq ima sapinngisamik aaqqissuunneqarlunilu pissaaq uumasooq minnerpaamik anniartillugu toqunneqarnialerneranilu aamma toqunneqarnerani annilaangatinneqassanani.

Imm. 3. Qimmimik qitsummilluunniit aallaallugu toqutsiniartup isumagissavaa uumasooq illersorneqarsinnaasumik aalaakkerluarsimanissaa imaluunniit pitussimanissaa isumagissavaa, taamaalilluni pissannissaanut aarlerinaat minnerpaaffianiitinniarneqassalluni.

Imm. 4. Imm. 1-imi aalajangersagaq apeqqutaatinnagu toqutseriaatsit allat atorneqamissaat Naalakkersuisut akuersissutigisinnaavaat tamanna uumasunik illersuineq eqqarsaatigalugu illersorneqarsinnaappat.

§ 10. Qimminik qitsunnillu aallaallugit illoqarfiit nunaqarfiillu aamma najugaqarfiit 500 meterit iluanni toqutsisoqarniarpat tamanna uumasut nakorsaannit imaluunniit Naalakkersuisut qimminik nakkutilliisutut akuerisaannit taamaallaat suliarineqassaaq, taamaattoq imm. 2 aamma 4 takukkit.

Imm. 2. Allatut ajornartillugu politiit imm. 1 naapertorlugu aallaallugu toqutsisinnaapput, qimminik nakkutilliisumik imaluunniit uumasut nakorsaannik najuuttoqanngippat.

Imm. 3. Qimminik nakkutilliisut uumasullu nakorsaata imm. 1 malillugu toqutsinnginnerminni akuersissummik kommunalbestyrelsimut piniaqqaassapput.

Imm. 4. Kommunalbestyrelse pisuni ataasiakkaani imm. 1 naapertorlugu uumasunut nakorsaangitsunut aamma Naalakkersuisunit akuerisaallutik qimminik nakkutilliisuunngitsunut akuersissuteqarsinnaavoq, makku tunngaviuppata:

1) uumasup nakorsaata Naalakkersuisulluunniit akuerisaattut qimminik nakkutilliisup tikinnissaannut toqutsinissaq utaqqissunneqarsinnaanngippat, taamaaliormi uumasooq pisariaqanngitsumik naalliutsinneqarluni, soorlu pilertortumik napparsimalersimappat ajoqusersimappalluunniit, imaluunniit

2) illoqarfimmi nunaqarfimmiluunniit pineqartumi uumasut nakorsaqaanngippat Naalakkersuisulluunniit akuerisaannik qimminut nakkutilliisoqanngippat, taakkulu piffissap naammaginatup iluani sumiiffimmut pineqartumut tikiussinnaanngipata.

Imm. 5. Imm. 4, nr 2 malillugu piffissaq naammaginartoq tassaassaaq akunnerit minnerpaamik 72-it.

§ 11. Qimmimik qitsummilluunniit toqutsiniartup toqutami illersorneqarsinnaasumik peernissaa isumagissavaa. Ima peerneqassaaq:

1) nunamut qaqqamiluunniit minnerpaamik 1 meterisut ititigisumut assaanneqassaaq kingorna issumik, sioqqanik ujaraaqanilluunniit matoorneqassalluni,

2) ikuallaavimmi ikuallallugu, imaluunniit

3) immamut kiversarlugu.

Imm. 2. Qimmit qitsuillu nappaalanertik imaluunniit nappaalatorineqarnertik tunngavigalugu toqunneqartut nappaataannik siaruaattoqannginnissaa piniarlugu toqunneqarnerisa kinguninngua ikuallanneqassapput.

Imm. 3. Imm. 2 naapertorlugu ikuallaaneq ikuallaavimmi pissaaq imaluunniit nalinginnaasumik ikuallaaviliornikkut assigisaanilluunniit ikuallaanikkut. Nalinginnaasumik ikuallaanermi uumasooq nunguillugu ikuallanneqarsimassaaq, taamaalilluni meqqui, nukii aqitsortaalu allat arsakuinnanngorlugit nungunneqassallutik.

Kapitali 4

Qitsunnik gassi atorlugu toqutsineq

§ 12. Qitsunnik gassi atorlugu toqutsiniartut Kalaallit Nunaanni Uumasunut Nakorsaqqarfik Inuusutissalerinermullu Oqartussanit tamatumunnga akuersissummi piniassapput.

Imm. 2. Sakkut, atortorissaarutit assigisaallu qitsunnik gassimik toqutsiniarnermi atorneqqartussat Kalaallit Nunaanni Uumasunut Nakorsaqqarfik Inuusutissalerinermullu Oqartussanit atorneqalinnginneranni akuerineqqarsimassapput.

§ 13. Qitsunnik gassi atorlugu toqutsineq pissaaq kulilte (CO) imaluunniit kuldioxid (CO₂)atorlugit.

§ 14. Kultitemik, tassa ipinartumik, atuinermi uumasut inissinneqqarfissaat ineeraq ima ilusilersugaassaaq, aqqissugaalluni aserfallatsaalisaalluni uumasut gassimik toqunniarneqqarneranni ajoqusersinnaajunnaarsillugillu nakkutigineqqarsinnaasunnngortillugit.

Imm. 2. Uumasut inissiffissaannut ineeqqamut aatsaat isertinneqqassapput ineeqqami kuliltep annertussusaa minnerpaamik 1 volumenprocentimiilersimareerpat.

Imm. 3. Gassi qitsummik toqutsinermi atortussatut naatsorsuussaq motorimit aniatinneqqarsinnaavoq kuliltep annertussusaa minnerpaamik 1 volumenprocentimiilereersimappat uumasut ineeqqamut aatsaat isertinneqqassappata gassilu atorneqqartoq imaappat:

- 1) naammattumik nillorsimappat,
- 2) naammattumik sukuluiagaappat aamma
- 3) iluaalliuutaasinnaasunik akoqanngippat imaluunniit iluaalliuutaasinnaasunik gasseqanngippat.

Imm. 4. Gassi najuussorneqqartoq siullermik ilisimajunnaartitsissutaassaaq kingornalu qularnaatumik toqqutaassalluni.

Imm. 5. Uumasut ineeqqamiitinneqqassapput toqunissaasa tungaannut.

Imm. 6. Gassi motorimit aniatinneqqartoq atorneqqarpat, soorlu imm. 3-mi eqqaaneqqartoq, uumasunik sunilluunniit toqutsinialinnginnermi atortut toqutsissutaasussat misileqqaarneqqarsimassapput.

§ 15. Qitsunnik toqutsinermi kuldioxid maqitsivimmeersoq atorneqqarsinnaavoq, pissutsit makku atuuppata:

- 1) uumasut ineeqqamut eqqunneqqarfissaat gassimillu najuussuiffissaat ima ilusilersugaappat, aqqissugaalluni aserfallatsaalisaalluni uumasut gassimik toqunniarneqqarneranni ajoqusersinnaajunnaarsillugit nakkutigineqqarsinnaatillugillu,
- 2) Ineeqqap toqutsiviusussap silaanna annerpaaffissaatigut kuldioxidimik akuitsumik isaatitsiffigineqqareersumut uumasut ineeqqamut toqutsiviusussamut aatsaat isertinneqqarsinnaappata,
- 3) gassi najuussorneqqartoq siullermik ilisimajunnaartitsissutaqqaarluni kingornalu qularnaatumik toqqutaasinnaappat, kiisalu

4) uumasut toqunissaasa tungaannut ineeqqamiitinneqarsinnaappata.

Kapitali 5

Aallaammik qimminik qitsunnillu toqutsineq

§ 16. Qitsummik qimmimilluunniit toqutsiniartup qulakkeeqaassavaa aallaanninnermi avatangiisit navianartorsiortinneqannginnissaat, matumani ilanngullugit aqerlut amerlasuullu maanngaanaq aallartunik uumasunut inunnulluunniit navianartorsiortitsinnginnissaat.

§ 17. Qimminik qitsunnillu toqutsinermi qoorortoq timmiarsiulluunniit atorneqassaaq.

Imm. 2. Illuinnarsuutininik boltpistolunillu taamaallaat atuisoqarsinnaavoq Kalaallit Nunaanni Uumasunut Nakorsaqaarfik Inuusutissalerinermullu Oqartussanit ilitsersuisoqareerpat. Taamatuttaaq aallaammik taamatut ittumik pigisaqaraanni atuigaannilu Aallaasit pillugit inatsimmi aalajangersakkat naapertorlugit Kalaallit Nunaanni Politimesterimiit akuersissut pigineqartariaqarpoq.

Imm. 3. Bolt pistol atorneqassappat patronia ima annertutigissaaq, tamanna qimminik qitsunnillu toqutsinissamat uumasut illersorneqarnerat eqqarsaatigalugu tulluuttuussalluni.

Imm. 4. Imm. 2-mi aalajangersakkat apeqqutaatinnagit politiini illersornissamullu suliaqartuni sulisut sulinerminnut atatillugu illuinnarsuutertik atorlugu qimminik qitsunnillu illersorneqarsinnaasumik aalaakkerneqarsimasunik toqutsisinnaapput.

§ 18. Qarasaanut toqqaannartumik igittoqassaaq, taamaattoq imm. 2 takuuk

Imm. 2. Uumasooq perlerorsorineqarpat uummataatigut aallaaneqassaaq.

Imm. 3. Toqutsisoqassanngilaq uumasup toqunniakkap ungasissusaa 15 meterinik ungasinneruppat.

Imm. 4. Imm. 3 apeqqutaatinnagu qimmit pituussaarnikut iluatsinngitsumik tiguniarneqartaraluartut qoorortoq qinngutitalik atorlugu 50 meterit tikillugit ungasitsigisoq aallaallugu toqunneqarsinnaavoq.

Imm. 5. Qimmeq pituussaarnikoq imm. 4 malillugu qarasaatigut aallaallugu toqunneqarsinnaanngippat sapinngisamik uummataatigut aallaaniarneqassaaq.

Kapitali 6

Qoorortoq atorlugu toqutsineq

§ 19. Qimmit qitsuillu toqunniarneqarsinnaapput qoorortoq .22 magnum annerluunniit atorlugit.

Imm. 2. Aqerlut inngigissut kanngussammik saviminernilluunniit puullit atoqqusaanngillat.

Kapitali 7

Timmiarsiut atorlugu toqutsineq

§ 20. Timmiarsiutit kaliber 20-it annerilluunniit qimminik qitsunnillu toqutsinermit taamaallaat atoqqusaapput.

Imm. 2. Amerlasuut savimernit toqutsinermit atorneqarpata diameteriat minnerpaamik 3,75 mm-iussapput.

Kapitali 8

Pineqaatissiinissamut atuutilersitsinissamullu aalajangersakkat.

§ 21. §§-inik 3-8, § 9, imm.1-3, § 10, imm.1-2, aamma §§-inik 11-20 unioqqutitsinerit akiliisitsinermit pineqaatissiissutaasinnaapput.

Imm. 2. Inatsisitigut pisussaatitaasoq Kalaallit Nunaanni Pinerluttulerinermut inatsimmi malittarisassat malillugit akiliisussanngortitaasinnaavoq.


Imm. 3. Imm. 1-imi aalajangersakkanik peqqarniitsumik utikattumilluunniit unioqqutitsinerit sunilluunniit uumasuteqarsinnaanermik qaqugumulluunniit imaluunniit piffissami killilimmi inerteqqusiisoqarsinnaavoq.

Imm. 4. Nalunaarut manna malillugu akiliisitsinermit pineqaatissiissutit Nunatta karsianut nakkartinneqassapput.

§ 22. Nalunaarut atuutilerpoq ulloq 1. februaari 2018-imi.

Namminersorlutik Oqartussat, ulloq 28. decembari 2017


Karl Kristian Kruse


Jørgen I. Olsen